



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

08 մայիսի 2024 թվականի թիվ 44-Ա

ք.Երևան

«ՄԵԴԻԱ ՄԱՐՍԵՏ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ Հանձնաժողով), ուսումնասիրելով 2024 թվականի ապրիլի 11-ին իր նախաձեռնությամբ հարուցված թիվ 13 վարչական վարույթի նյութերը, պարզեց.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս հայտնաբերել է Օրենքի պահանջի խախտում, այն է՝ հեղինակազորված «ՄԵԴԻԱ ՄԱՐՍԵՏ» ՍՊ ընկերության (այսուհետ՝ նաև Հեռարձակող) կողմից իր 2023 թվականի հասույթի գոյացման բացվածքը և չափի վերաբերյալ տեղեկությունը մինչև 2024 թվականի ապրիլի 01-ը Հանձնաժողով չի ներկայացվել:

Հանձնաժողովը, ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով, 2024 թվականի ապրիլի 11-ին Հեռարձակողի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2024 թվականի ապրիլի 11-ին ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Հարուցված վարչական վարույթի ընթացքում Հեռարձակողը, 2024 թվականի ապրիլի 12-ին Հանձնաժողով ներկայացրած իր պարզաբանմամբ հայտնել է, որ իր 2023 թվականի հասույթի գոյացման բացվածքը և չափի վերաբերյալ տեղեկությունն ուղարկել է Հանձնաժողովի secretariate@tvradio.am էլեկտրոնային փոստի հասցեին օրենքով սահմանված ժամկետում՝ սույն թվականի մարտի 29-ին ժամը 03:16-ին:

Հեռարձակողն իր պարզաբանմանը կից ներկայացրել է հասույթի վերաբերյալ տեղեկության սրբինշոթերը և իր 2023 թվականի հասույթի գոյացման բացվածքը և չափի վերաբերյալ տեղեկությունը:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննությամբ, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Համաձայն Օրենքի 1-ին հոդվածի 4-րդ մասի՝ սույն օրենքը Հայաստանի Հանրապետությունում տարածվում է տեսալսողական մեդիաձառայություն մատուցողների, օպերատորների, կարգավորող պետական մարմնի և հանրային տեսալսողական մեդիաձառայություն մատուցողի գործունեության կառավարումն ապահովող և հսկողություն իրականացնող մարմնի վրա:

Օրենքի 3-րդ հոդվածի 1-ին մասի 1-ին և 23-րդ ենթակետերը հստակ տալիս են հետևյալ հասկացությունների սահմանումները՝

1) **տեսալսողական մեդիաձառայություն** մատուցող (այսուհետ՝ Հեռարձակող, լսողական մեդիաձառայություն մատուցող՝ Լսողական ծրագրեր հեռարձակող) Հայաստանի Հանրապետության հիմնադրած կազմակերպություն կամ կարգավորող պետական մարմնի հեղինակագործ ֆիզիկական կամ իրավաբանական անձ, որը կազմում և սպառողին է ներկայացնում տեսալսողական տեղեկատվություն և խմբագրական պատասխանատվություն է կրում տեսալսողական արտադրանքի բովանդակության համար:

23) **հեղինակագրում**՝ կարգավորող պետական մարմնի կողմից ֆիզիկական կամ իրավաբանական անձին Հեռարձակողի կարգավիճակ տրվող փաստաթղթի տրամադրում:

Օրենքի 19-րդ հոդվածի 3-րդ մասի համաձայն՝ Հեռարձակողները և օպերատորները պարտավոր են յուրաքանչյուր տարի մինչև ապրիլի 1-ը կարգավորող պետական մարմնին ներկայացնել նախորդող տարվա հասույթի գոյացման բացվածքը և չափի վերաբերյալ տեղեկություն:

Ուստի Օրենքով սահմանված նորմերի պահանջները պարտադիր են ոլորտում գործունեություն իրականացնող բոլոր տեսալսողական մեդիաձառայություն մատուցողների և օպերատորների համար:

Հանձնաժողովը 2024 թվականի մարտի 12-ի թիվ Ե/04/04.1/234-24 գրությամբ հեռարձակողներին և ցանցային օպերատորներին տեղեկացրել է Օրենքի վերոնշյալ դրույթի մասին և առաջարկել է Օրենքով սահմանված ժամկետում Հանձնաժողով ներկայացնել 2023 թվականի հասույթի գոյացման բացվածքը և չափի վերաբերյալ տեղեկություն:

Հանձնաժողովի կողմից ուսումնասիրվել են վարչական վարույթի վերաբերյալ Հեռարձակողի կողմից ներկայացված բացատրություններն ու պարզաբանումները, նաև վարչական վարույթի շրջանակում Հեռարձակողի կողմից ներկայացված ապացույցները:

Ուսումնասիրությունից պարզ է դարձել, որ Հեռարձակողը 29.03.2024 թվականին secretariate@tvradio.am էլեկտրոնային հասցեին է ուղարկել իր 2023 թվականի հասույթի գոյացման բացվածքը և չափի վերաբերյալ տեղեկությունը, որի վերաբերյալ Հեռարձակողը որպես ապացույց ներկայացրել է էլեկտրոնային փոստից քաղվածքներ (սքրինշոթեր):

Փաստենք նաև, որ Հանձնաժողովի քարտուղարությունում անցկացվել է ուսումնասիրություն Հեռարձակողի կողմից նշված նամակների ուղարկման վերաբերյալ, որի

առթիվ Հանձնաժողովի քարտուղարության պետի կողմից ներկայացվել է զեկուցագիր, համաձայն որի՝ Հանձնաժողովի քարտուղարության secretariate@tvradio.am էլեկտրոնային հասցեին «ՄԵԴԻԱ ՄԱՐՍԵՏ» ՍՊ ընկերության կողմից որևէ գրություն չի ստացվել: Հանձնաժողովի քարտուղարության պետը սույն հարցի վերաբերյալ խորհրդակցել է Հանձնաժողովի էլեկտրոնային փոստի համար պատասխանատու աշխատակցի հետ, ով պնդում է, որ Հանձնաժողովն էլեկտրոնային փոստի հետ կապված որևէ տեխնիկական խնդիր չունի: Կից ներկայացվել է վերոնշյալ էլեկտրոնային հասցեի՝ հիշյալ օրվան նախորդող և հաջորդող օրերի նամակագրության սքանավորված էջերը՝ 3 (երեք) թերթ:

Այսպիսով, վարչական վարույթի նյութերի ուսումնասիրության և համադրման արդյունքում Հանձնաժողովն ամրագրում է, որ Օրենքով Հեռարձակողների և օպերատորների համար պարտավորություն է սահմանված յուրաքանչյուր տարի մինչև ապրիլի 01-ը Հանձնաժողով ներկայացնել նախորդող տարվա հասույթի գոյացման բացվածքը և չափի վերաբերյալ տեղեկություն:

Փաստում ենք նաև, որ Հեռարձակողը Հանձնաժողովի կողմից հեղինակագրված իրավաբանական անձ է և պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ օրենքի դրույթները խախտելու դեպքում կրել պատասխանատվություն օրենքով սահմանված կարգով:

Հանձնաժողովի կողմից հաշվի են առնվել Հեռարձակողի կողմից ներկայացված պարզաբանումներն ու փաստարկները, մասնավորապես, որ նշված վարույթի շրջանակում կարգավորող պետական մարմնի համար անհրաժեշտ տեղեկությունը՝ հասույթի գոյացման բացվածքը և չափի վերաբերյալ տեղեկությունը մինչև ապրիլի 01-ը, ավելի կոնկրետ՝ 29.03.2024 թվականին, իրենց կողմից ներկայացվել է secretariate@tvradio.am էլեկտրոնային հասցեին, սակայն Հանձնաժողովն այն չի ստացել միգուցե էլեկտրոնային փոստի տեխնիկական խնդիրների պատճառով:

Փաստենք նաև, որ «Վարչարարության հիմունքների և վարչական վարույթի մասին» օրենքի 10-րդ հոդվածով նախատեսված է հավաստիության կանխավարկածը, համաձայն որի՝

«1. Վարչական մարմնի կողմից քննարկվող փաստական հանգամանքների վերաբերյալ անձի ներկայացրած տվյալները, տեղեկությունները համարվում են հավաստի բոլոր դեպքերում, քանի դեռ վարչական մարմինը հակառակը չի ապացուցել:

Արգելվում է անձանցից պահանջել իրենց ներկայացրած տվյալները, տեղեկությունները հավաստող փաստաթղթեր կամ լրացուցիչ տեղեկություններ, եթե այդ պահանջը սահմանված չէ օրենքով:

Եթե վարչական մարմինը հիմնավոր կասկածներ ունի անձանց ներկայացրած տվյալների, տեղեկությունների իսկության վերաբերյալ, ապա ինքը պարտավոր է ինքնուրույն և իր հաշվին ձեռնարկել միջոցներ դրանց իսկության մեջ հավաստիանալու համար:

2. Անձինք պատասխանատվություն են կրում վարչական մարմիններին կեղծ տվյալներ, տեղեկություններ ներկայացնելու համար:»

Այսպես, Հանձնաժողովը, հիմք ընդունելով վերը նշված օրենքների դրույթները, ընդունում է Հեռարձակողի կողմից ներկայացված ապացույցները որպես հավաստի և որպես վարչական մարմին չունի հիմնավոր կասկածներ Հեռարձակողի կողմից ներկայացված տվյալների, տեղեկությունների և ներկայացված ապացույցների իսկության վերաբերյալ:

Հաշվի առնելով այն հանգամանքը, որ Հեռարձակողը փաստացի Օրենքով նախատեսված ժամկետում՝ մինչև 2024 թվականի ապրիլի 01-ը, կարգավորող պետական մարմին ուղարկել է իր 2023 թվականի հասույթի գոյացման բացվածքը և չափի վերաբերյալ տեղեկությունը, սակայն Հանձնաժողովն այն չի ստացել տեխնիկական խնդիրների պատճառով, և հիմք ընդունելով այն փաստը, որ Հանձնաժողովը չունի հիմնավոր կասկածներ Հեռարձակողի կողմից ներկայացված տվյալների, տեղեկությունների և ներկայացված ապացույցների իսկության վերաբերյալ՝ ուստի վարչական վարույթի բազմակողմանի, լրիվ և օբյեկտիվ քննությամբ, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Հեռարձակողի նկատմամբ հարուցված թիվ 13 վարչական վարույթը ենթակա է կարճման:

«Վարչական իրավախախտումների վերաբերյալ» օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

«Վարչական իրավախախտումների վերաբերյալ» օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և ղեկավարվելով «Տեսալսողական մեդիայի մասին» օրենքի 1-ին հոդվածի 4-րդ մասով, 3-րդ հոդվածի 1-ին մասի 5-րդ կետով, 19-րդ հոդվածի 3-րդ մասով, «Վարչարարության հիմունքների և վարչական վարույթի մասին» օրենքի 10-րդ հոդվածով և հիմք ընդունելով «Վարչական իրավախախտումների վերաբերյալ» ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց՝**

1. «ՄԵԴԻԱ ՄԱՐՍԵՏ» ՍՊ ընկերության նկատմամբ հարուցված թիվ 13 վարչական վարույթը կարճել:

2. Սույն որոշումն ուժի մեջ է մտնում այն «ՄԵԴԻԱ ՄԱՐՍԵՏ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ.ՀԱԿՈԲՅԱՆ

2024թ. մայիսի 08
ք.Երևան